

## Kapiya Sën Paulus Kevu Vu Kerisi-yi-alam Vu Pilipi

<sup>1</sup> Kerisi Yesu yi hur sa Paulus geTimoti, balu kevu kapiya sënë yök vu ham Pilipi pin sën Kerisi Yesu yi alam ham lo, ving ggev sën denegin dub los alam sën denelok vu ham lo. <sup>2</sup> Hil Amad Anutu luho Mehöböp Yesu Kerisi degevong semusën vu ham bedegevong ham ayomin gëp revuh.

### *Paulus Kwa Vesa Vu Anutu*

<sup>3</sup> Sën sa kwaǵ nevo ham lo, og sa najom rak vu sa Anutu los kwaǵ vesa in ham rot. <sup>4</sup> Lob sën sa neketag vu Anutu bë dok vu ham lo, og sa neketag los ahëg nivesa in ham. <sup>5</sup> Sa kwaǵ vesa in ham nelok vu sa gesa nanér Bengö Nivesa rangah. Vu nyé dahis rot beverup gwëbeng. <sup>6</sup> Lob serak ni gbovek bë Anutu yö vong huk nivesa lok ham ayomin vu nyé dahis, lob yö rëk medo gevong rot begovek na dok buk sën Kerisi Yesu duk nom lo.

<sup>7</sup> Log sën sa kwaǵ vesa in ham lo, og sagaǵ yoh vu. In buk vahi og sa nado ƙarabus, log buk vahi og sa nehevong huk in bë gadu Bengö Nivesa balam degevong geving niwëék. Lob nelok buk saga pin, og ham kwamin nevo sa, om huk sën sa nehevong banon nerak menesemu alam vahi lo, og yiń ham nevong huk sagi ving behil kwad vesa lok ti, om sën sa kwaǵ nevo ham yoh vu buk pin.

<sup>8</sup> Senér yönö neggp Anutu mala bë sayog nepebip sa in bë senök galë ham pin, in sahëg neving ham nebë sën Kerisi Yesu ahë neving ham lo. <sup>9</sup> Lob

sa najom rak in ham bë ham ahëmin geving ham niwëek rot noh vu buk pin bena meböpata jak. Gesa najom rak ving bë ham natök vu kwa nivesa rot beham seggi ngaa pin, <sup>10</sup> in ham jak ni nabë nivesa ma nipaya. Nabë saga in ham natu alam yohvu gengaa nipaya su gëp vu ham rë, rot bena berup dok buk sën Kerisi duk nom lo. <sup>11</sup> Lob ngaa niröp sën Yesu Kerisi yoh vu bë gevong banon jak dok hil ayod lo napup ham ayomin rot. In sënë rëk gecko Anutu arë jak nabë mehö niwëek los arë böpata.

### *Paulus Ya Ƙarabus Lob Sënë Lok Vu Bengö Nivesa*

<sup>12</sup> Arig lo, sa bë ham jak ni nabë ngaa sën tök vu sa agi, og su ggérin Bengö Nivesa rë. Gaƙ nelok vu meneya rot. <sup>13</sup> In alam-begö-yi pin sën denegin mehö-los-bengö Sisar\* yi beggang lo, galam vahi pin, og derak sa niğ ggovek ya bë seyam ƙarabus in Kerisi yi hur sa.

<sup>14</sup> Lob arig lo ngahisekë sën ayoj neya timu vu Mehöböp lo kwaj nevo sa bë seyam ƙarabus, lob ayoj niwëek rak in sënë, lob devuu ggönengsën ya genij wëek rak medenér Anutu yi ƙagek rangah. <sup>15</sup> Yonon, sir vahi og ahëj nipaya in sarëg ya, lob denevong in bë dedahun sa, om sën denenér Kerisi yi ƙagek rangah rak degwa sënë, rëk sir vahi og ahëj nivesa medenenér Kerisi arë los ayoj niröp.

<sup>16</sup> Alam sënë derak ni bë sa nado sënë in bë sa ƙadu Bengö Nivesa, om sën ahëj neving sa medenenér ƙagek rangah. <sup>17</sup> Rëk sir vahi og denenér Yesu yi ƙagek in bë degeko yö arë jak. Gaƙ ayoj su niröp rë. Yonon, denevong in bë debo maggin la dok na

geving vu sa dok ƙarabus. <sup>18</sup> Rék yiƙ sagak ngaa meris. Bé denanér los ayoj niröp, ma su denanér los ayoj niröp rë, og yiƙ ggovek. Denenér Kerisi yi gagek rangah, om sa kwağ vesa in sénë, gesék kwağ vesa rot. <sup>19</sup> In serak ni bë ngaa sénë rék dok vu sa besék medo nivesa, in serak ni ggovek ya bë ham nejom rak yoh vu buk in bë dok vu sa, lob Yesu Kerisi yi Anon Vabuung gadu sa. <sup>20</sup> Sa navo kwağ in ngaa timu, gesa hevong ving bë rék anon jaƙ nabë: Sa su rék niğ namum in ngaa sén sa nehevong ggëp dob lo ti rë. Gaƙ nabë sa nadiiƙ, ma nabë sa medo vesag, og sa bë gevong ngaa pin sénë los niğ wëæk in geko Kerisi arë jaƙ. Vu pehi sénë, genoh vu buk pin. <sup>21</sup> In sa og sa kwağ nevo nebë sénë: Nabë sa medo vesag og nivesa, in setu Kerisi-yi-alam ti ggovek ya. Gaƙ nabë sa nadiiƙ og nivesa rot, in sék medo geving Kerisi yönö. <sup>22</sup> Rék mu nabë sengo nahën medo vesag vu dob, og sék gevong huk vahi geving banon jaƙ, om mak sék gevong nabë va? Sa dugin! <sup>23</sup> Sa kwağ luu luu in sénë. Sa bë nadiiƙ bena medo geving Kerisi in sénék nivesa rot. <sup>24</sup> Gaƙ mu nabë sengo nahën nemedo dob, og yiƙ nivesa rot, in mém sék medo medok vu ham rë. <sup>25</sup> Om sa kwağ neya timu meserak ni bë mak sék medo vesag medok vu ham in ham gwewong geving niwëæk bekwamin vesa rot. <sup>26</sup> Nebë saga, om nabë dekevelekin sa besenök berup vu ham gökin, og ham rék kwamin vesa in begweko Kerisi Yesu arë jaƙ pangşën.

*Alam Pilipi Losho Paulus Degebë Dok Ti  
Medengis Begö In Bengö Nivesa*

<sup>27</sup> Rëk mu ham sepa dok Kerisi yi Bengö Nivesa niröp in nabë senök galë ham, og sejaḳ ni. Ma nabë sa ḡango ham bengömin mu, og yiḳ ggovek, gesék ḡango nabë ham ahëmin neving ham menare lok ti, bayomin ti, benelok vu ham menesis begö in Bengö Nivesa in bë na meniwëek jak balam degevong geving. <sup>28</sup> Sa hevongin bë ḡango ham bengömin nabë ham su nehönengin alam sën denekeyeh ham gagek lo rë. Gaḳ sa bë ḡango nabë ham nare niwëek. Bë ham bare niwëek nabë saga, og saga netato bë rëk malaj nama. Log netato ving bë Anutu rëk geko ham nah vu yi beham medo nivesa. <sup>29</sup> In Anutu su vo semusën sënë vu ham bë ham ayomin na timu vu Kerisi mu rë, gak vo semusën ngwë vu ham bë kwerë maggin vahi geving in ham tu yi alam. <sup>30</sup> Yiḳ hil nasis begö ggëp ti in Bengö Nivesa, nebë sën ham lë gesa nehevong wirek lo, genebë sën ham ngo bë sa nahen nehevong gwëbeng agi.

## 2

### *Hil Dahun Hil Gahëd Geving Arid Lo*

<sup>1</sup> Maḳ ham neko niwëek vu Kerisi? Kerisi ahë neving ham lom saga vong beham ayomin to revuh-a? Gemak Anon Vabuung neduu hil tu alam yu timu? Gemak ham ahëmin neving mehönon gekwamin nevongin sir-a? <sup>2</sup> Om nabë nebë saga og mëm ham sepa dok kwa timu. Ham ahëmin geving ham anon rot, beham medo jevuh ti, beham malamin sepa huk timu. Bë ham gwevong nabë saga, og ham rëk gwevong besa kwag̊ vesa böpata rot. <sup>3</sup> Ham su kwamin bo ham mu beham gweko ham jak. Gaḳ ham gurek alam vahi babuj

geham kwamin bo sir nabë dekesuu ham rak ngaa nivesa. <sup>4</sup> Geham su gwegin ham ngo ham ngaa mu, ga  ham gwegin meh  ngw  hir ngaa geving.

### *Kerisi Dahun Yi Lob Anutu Ko Ar  Rak*

<sup>5</sup> Ham kwamin bo ngaa nab  s n Kerisi Yesu nevong lo.

<sup>6</sup> Anutu so ek yi,

r k mu su kwa nevo b  najom aggata s n luho  
Anutu negg p ti lo ahon r .

<sup>7</sup> Ga  vuu aggata s n  ya getu meh non rak,  
bevong ngaa neb  hur meris.

<sup>8</sup> Tu meh non bedel  yi neb  meh non so ek,  
r k m m y  dahun yi genesepa lok Anutu aye  
rot bediik.

Y non, dii k rak  lepeko\* neb  alam nij paya.

<sup>9</sup> Om s n Anutu ko yi rak, rak y k degwa s n ,  
bek  yi rak yah vavun  rot.

Lob tung ggev ti s n kesuu ggev vahi pin lo rak  
yi.

<sup>10</sup> In nab  degengo Yesu ar ,

og alam pin vu y gek gev  dob gev  dob  
gebin 

r k dengun lusej vu yi.

<sup>11</sup> Log meh non pin r k denan r rangah dok ayej  
nab :

Yesu Kerisi tu Meh b p.

Gedegeko Ama Anutu ar  jak nab  saga.

### *Hil Naj h Nab  Betuheng*

<sup>12</sup> Om sa meh  lo! Ham ngo medo gwevong  
noh vu sayeg nab  s n ham nevong aga. Y non,  
s n sa nado ving ham wirek lo og ham nevong,  
ga  gw beng s n  sen go nado adingn , om ham

pasang gwevong nabë saga. Anutu ḥo ham yah vu yi om ham ayomin na timu beham ḡöneng in yi begurek babu in mém rëk geko ham nah vu yi beham medo geving yi vu tamusën. <sup>13</sup> In hil arak ni bë Anutu nevong huk lo᷑ ham. Yō nevér ham kwamin, lob mém ham nevong ngaa yoh vu sën ahë neving lo.

<sup>14</sup> Log ngaa pin sën ham gwevong lo, og ham gwevong los nimin yes, gak ham su gwevong ayemin vu los gök ham in. <sup>15</sup> Ham gwevong nabë sënë in ngaa nipaya su gëp vu ham, gak ham medo niröp nabë sën Anutu nalu ham lo. Yonon, ham nedo lo᷑ alam nij paya los alam gagek tetuhinsën vuheng, rëk mu ham rëk najëh jak sir nabë betuheng. <sup>16</sup> Ham nanër gagek sën yoh vu bë gevong bemehönon demedo malaj-tumsën lo vu sir in mém sa napisek in dok buk sën Kerisi duk nom dob lo. In sëk jak ni nabë sa su nevasap sa menehevong huk meris rë. <sup>17</sup> Alam Yuda denesis reggu tu seriveng, lob denekeseh wain rak ving, lob yi᷑ sën ham ayomin neya timu vu Kerisi lo nebë seriveng saga. Log nabë dengis sa, og yi᷑ ggovek, in sa nig kök rëk keseh nabë wain sën denekeseh rak ham seriveng lo, lob sëk kwag vesa geving ham. <sup>18</sup> Om yi᷑ ham kwamin vesa geving nabë saga behil kwad vesa dok ti.

### *Timoti Yi Gagek*

<sup>19</sup> Nabë Mehöbëp Yesu kwa bo, og sëk gevong Timoti nök vu ham, lo᷑ mém rëk nom nanër ham bengömin vu sa besa kwag vesa. <sup>20</sup> In su sa mehö ngwë nedo balu kwamin nevo ngaa neggëp ti nebë Timoti rë. Yō kwa nevo ham rot bë dok vu ham.

<sup>21</sup> Gaķ alam vahi pin og yö denegin yö hir ngaa gesu kwaj nevo Yesu Kerisi yi huk rë. <sup>22</sup> Rëk Timoti og ham rak ni bë yi mehö nivesa benelok vu sa in Bengö Nivesa nebë sën hurmahen ti nelok vu ama. <sup>23</sup> Sa bë gevong yi nök pevis vu ham, rëk mu sejaķ ngaa sën rëk natök vu sa lo ni namugin lok mêm. <sup>24</sup> Rëk mu sa hevong ving bë Mehöböp rëk tatekin aggata gesengo rëk nök vu ham geving.

### *Epaproditus Yi Gagek*

<sup>25</sup> Log sa kwag nevo bë mak sëk gevong hil arid Epaproditus nah vu ham gökin pevis. Wirek ham vong yi lok yah ham bömin beyam lok vu sa, balu nehevong huk lok ti galam desis begö vu aluu in Bengö Nivesa. <sup>26</sup> Rëk tum nevo kwa in ham bë nök gelë ham. Gayo maggin rot in ham ngo bë nirak. <sup>27</sup> Yönon, nirak böpata lob dus rak bë nadiiķ na. Rëk Anutu kwa vongin aluu belok vu yi in bë su nadiiķ besayog maggin böpata rot rë. <sup>28</sup> Om sën sa kwag nevo rot bë sa gevong yi nök pevis beham gwellé yi gökin bekwamin vesa lob mêm sa maggin rëk ahë yes jak teka geving. <sup>29</sup> Om ham gweko yi nök vu ham los kwamin vesa in Mehöböp yi hur yi. Geham gweko alam nabë sënë arëj jak. <sup>30</sup> Dus rak bë nadiiķ dok Kerisi yi huk. In ham su yoh vu bë dok vu sa rë, om sën lok yah ham bömin benelok vu sa, rëk tök vu niraksen sënë bedus rak bë nadiiķ.

## 3

*Mehöti Sën Ayo Na Timu Vu Kerisi Lo, Og Yi  
Mehö Yohvu Yönon*

<sup>1</sup> Arig lo, sa bë semu gägek sënë hus nabë ham kwamin vesa in Mehöböp. Sa nanér gägek timu

sënë yoh vu buk, rëk mu sa su rëk nig tebö jak in rë, in ǵagek saga rëk gadu ham. <sup>2</sup> Ham gwegin ham in alam sën denevong huk nipaya nebë anöö bemën lo. Ham gwegin ham in alam nij paya sën denevongin bë dekepë ham lo. Geham gwegin ham in alam sën denevongin bë degerah\* ham navimin in mëm ham natu Anutu-yi-alam lo. <sup>3</sup> In degwa su neggp vu ngaa saga rë, gak hil sagi og Anon Vabuung nelok vu hil behil nehaço Anutu arë rak, om hil atu yi alam soğek. Hil su kwad nevo navid rë, gak hil napisek in Kerisi Yesu yö timu. <sup>4</sup> Yonon, mak sengo yoh vu bë kwag bo sa navig. Nabë mehö la kwaj nevo sën derah\* navij lo bë yoh vu bë geko sir nah vu Anutu, og seyoh vu bë nanér rot kesuu sir. <sup>5</sup> In satag ko sa lob buk tu nemadvahi-bevidek-löö lob derah\* sa navig. Sak Israel ti. Sa degwa vu Benyamin. Sak Hibru ti gesamac lu atag og Hibru ving. Log sa Parisai\* ti gesa nesepa lok Moses yi horek nebë sën sir lo. <sup>6</sup> Sa nig wëek rot bë sa gevong Anutu yi huk, om sën wirek og sa nasis Kerisi-yi-alam rot. Rëk mu nabë mehöti seggi sa jak Moses yi horek, og rëk gelë nabë sa nesepa lok pin los dahis.

<sup>7</sup> Lob wirek sa hekuung bë ngaa pin sënë og ngaa böp rot, lok tum sehérin sa tu Kerisi yi mehö lob serak ni bë ngaa pin sënë og yiń ngaa meris. <sup>8</sup> Sa su nanér rak Yuda hir ngaa mu rë. Gak serak ni bë Kerisi Yesu tu sa Mehöböp, om sën sa nehalë ngaa vahi pin bë ngaa meris. Sa nesepa lok Kerisi vaha, besa hevuu ngaa vahi pin ya, besa nehalë nebë laa, gesa bë najom Kerisi ahon <sup>9</sup> benatu yi mehö. Yonon, Horek su yoh vu bë gevong besa natu mehö yohvu rë. Rëk sayog neya timu vu Kerisi, om sën

Anutu nér sa bë sa mehö yohvu, in Anutu nenér mehönon bë sir alam yohvu degwa rak sën ayoj neya timu vu Yesu lo. <sup>10</sup> Sa bë sejaň Kerisi ni yönö. Gesa bë gako niwëek vu yi in diik gekedi rak yah. Sa hevongin bë gako kerus nabë sën ko lo, gesa bë sa su kwaň bo sa, gak sa bë dahun sa nabë sën Kerisi dahun yi bediňk lo. <sup>11</sup> Sa nehevong nebë sënë, in sa kwaň nevo bë rëk gevong besék kedi jak nah gëp bedub geving.

*Paulus Serög Niwëek In Bë Geko Kupek Nivesa  
Vu Yagek*

<sup>12</sup> Yönö, sa su kwaň nevo bë sa nehevong ngaa pin saga niröp beseyoh vu ggovek ya rë. Gak sengo nesepa lok ngaa pin sënë rot in bë sëk gako nyëvewen nivesa sën Kerisi Yesu ggooin rak in bë gevong vu sa lo.

<sup>13</sup> Arig lo, sa su rëk gako sa jak nabë sa haňo anon ggovek ya rë. Gak yiň sa nanér gagek timu sënë nabë: Sa hevuu ngaa wirek hen pin ya, gesa nehevong huk niwëek in bë sa gako ngaa tamusënyi. <sup>14</sup> Sa neserög niwëek in bë sa natök na telig vewen sën lo medegebë sarëg, lok mëm Anutu tahi sa mesena vavunë megako nyëvewen jak Kerisi Yesu yi huk. <sup>15</sup> Om hil sën Anutu nér hil nebë hil alam yohvu lo, hil pin kwad bo gagek gëp ti nabë hil gevong nabë sagi. Rëk nabë ham kwamin nevo gagek ngwë yööhu, og Anutu rëk tatekin ham kwamin. <sup>16</sup> Rëk mu gagek anon sën hil nesepa lok agi, og hil ngo najom ahon menapiiň vu.

<sup>17</sup> Arig lo, ham pin sepa dok sa vahag. Geham gwelë alam vahi sën denesepa lok sa lo geving nivesa, beham sepa dok he vahamin. <sup>18</sup> Senér

vu ham beron ngahisekë gbovek ya, log gwëbeng saķ nanér vu ham gökin los malaǵ bël nabë: Alam ngahisekë denelë Kerisi paya bedenevongin bë dedahun ǵagek sën netatekin yi կelepeko\* lo na.

<sup>19</sup> Alam sënë malaj anon in nos los reggu lu ngaa rot bedeneko rak tu hir anutu. Denepisek in ngaa nimumsën aggagga, gekwaj nevo ngaa dob yi mu. Om alam sënë rëk malaj nama gëp Nyëg Nipaya.

<sup>20</sup> Gak hil og hil atu alam-yagek-yi, lob hil nehegin bë Mehöböp Yesu Kerisi vu yagek meduk nom begeko hil nah. <sup>21</sup> Rëk gevong behil navid nipaya sënë pekwë yi bemalangeri jak nabë sën yö navi. Rëk gevong nabë sënë jak niwëek sën yoh vu bë getung ngaa pin degevek babu lo.

## 4

### *Paulus Nér Bë Ahëj Geving Sir Gekwaj Bo Ngaa Nivesa*

<sup>1</sup> Nebë sënë om arig lo, ham tu Mehöböp yi alam om ham ngo bare niwëek. Sahëg neving ham, besa nehevongin bë galë ham gökin. In sa kwaǵ vesa in ham, geham vong bë sa sok sengii yi.

<sup>2</sup> Log hong Ewodia, gehong Suntuke, melu gwengo rë! Melu semu ǵagek in Mehöböp yi hur avëh meluu. <sup>3</sup> Log hong sën alu nehebë lok ti in huk-e! Sa nanér vu hong nabë gedoǵ vu avëh luu sënë. In wirek og alöö nalok vu he in Bengö Nivesa ving Klement losho alam vahi sën he nehevong huk timu barëj neggpë lok կapiya-mala-tumsën-yi lo. <sup>4</sup> Ham kwamin vesa in Mehöböp jak buk pin, gesaǵ nanér gökin nabë ham pasanǵ kwamin vesa rot. <sup>5</sup> Ham gwevong balam pin dejak ham nimin nabë ham nejom ham ahon, geham su neko ham

raķ rē. In Mehöböp yam dus rak gгovek ya. <sup>6</sup> Om ham su newamin jak! Gak nabē ham jak vu in ngaa ti, og ham najom jak bekwetağ vu Anutu in, lob ham najom jak benanér los kwamin vesa vu yi geving. <sup>7</sup> Lok mëm Anutu rëk gevong beham ayomin gëp revuh. Alam dob-yi dugin ngaa sënë degwa besu detök rak rē, rëk mu sën ham ayomin gëp revuh lo rëk gevong beham ahëmin nivesa rot geham kwamin niröp jak in Kerisi Yesu yi alam ham.

<sup>8</sup> Arig lo, sa bë nanér gagek ti vu ham gökin nabē ham kwamin bo ngaa nabē sënë noh vu buk: Ngaa pin sën anon lo, gengaa sën niröp lo, gengaa sën neyohvu lo, gengaa pin sën nivesa lo, gengaa sën malangeri lo. Geham kwamin bo ngaa sën hil galë nabē nivesa lo los ngaa pin sën yoh vu bë hil gaко arë jak lo. <sup>9</sup> Ngaa pinek sa tahu ham lok, lob ham ko gгovek ya, gengaa pin sën sa nanér los sa nehevong lo, og ham ngo los ham lë gгovek ya, om ham gwevong nabē saga noh vu buk. Nabē saga, lob Anutu sën nevong behil ayod neggëp revuh lo rëk medo geving ham.

### *Paulus Kwa Vesa In Alam Pilip*

<sup>10</sup> Sa kwag vesa rot gesa napisek in ham vu Mehöböp, in ham nedo hus ading rëk gwëbeng ham kwamin vo sa belok vu sa ggökin. Yonon, ham kwamin nevo sa wirek bë dok vu sa, rëk aggata su neggëp in bë ham gwevong nam rë. <sup>11</sup> Sa su bë rëk nanér nabē sa narak vu in ngaa rë. Gak wirek og sa newaг nerak in ngaa sën netök vu sa lo, rëk gwëbeng og setu Yesu yi hur, lob sa nado revuh in ngaa pin. <sup>12</sup> Sehög ngaa bë paya teka, og

yik ggocek, genabë ngahisekë og yik ggocek. Log bë sega nos menajom sa ahon, ma meyip gevong sa, ma nabë senoh vu ngaa pin, ma sejaç vu in ngaa, og sa nehalë ngaa pin sënë bë yik neggëp ti, lob vu nyëg pin geyoh vu buk pin, og sayog sepëp. <sup>13</sup> Mehö sën lo negadu sa, lob seyoh vu bë gevong ngaa pin jak niwëek. <sup>14</sup> Rëk ham nevong nivesa, in ham neloç vu sa beham nekwerë sa maggin. <sup>15</sup> Yönon, ham alam Pilipi, ham ngo rak ni bë wirek sa nanër Bengö Nivesa vu distrik Masedonia nyëdahis lob ggocek gesa haya rak, rëk alam saga la su denevengwëng ving sa bë he dok vu he vewen vewen rë. Gak ham mu sën mëm ham nevong.

<sup>16</sup> In sa nado Tesalonika wirek, lob ham neloç vu sa benevong kupek vu sa, rëk su beron timu rë. <sup>17</sup> Rëk saga su nebë sa malaç anonin kupek rë. Gak sa hevongin bë ham gwevong huk nivesa nabë sënë in gevong beham nyëvewen böp jak besemu ham. <sup>18</sup> Lob gwëbeng og sa haço ngaa pin ggocek ya bengahisekë rot, beseyoh vu ggocek ya. Ham vong kupek vu sa bEpaproditus ko yam lok ya sa nemag ggocek ya. Kupek sënë vong bë seriveng sën ham nevesi bereggü nivesa verup neya vu Anutu lo. Om Anutu rëk gelë nivesa nabë yi seriveng, lob ahë nivesa in. <sup>19</sup> Lob ham tu Kerisi Yesu yi alam, om sa Anutu rëk gegin ham nivesa in ngaa pin sën ham nerak vu in lo jak ngaa nivesa vesa pin sën neggëp vu yi lo. <sup>20</sup> Om hil gako hil Amad Anutu arë jak na vavunë degwata los degwata. Yönon.

*Gagek Hus*

[21](#) Sa bë nanër na vu Kerisi Yesu yi alam pin nabë sa kwaǵ nevo sir. Log hil arid lo sën denedo ving sa agi denér bë kwaj nevo ham ving. [22](#) Yönon, Anutu-yi-alam pin denér bë kwaj nevo ham. Gesir vahi sën denevong huk ggëp mehö-los-bengö Sisar\* yi beggang̍ lo denér niwëek bë kwaj nevo ham ving. [23](#) Mehöböp Yesu Kerisi yi semusën nök gëp geving ham ƙenumin.

**Gagek Mewis  
The New Testament in the Central/Mapos dialect of the  
Buang language of Papua New Guinea  
Nupela Testamen long tokples Buang Mapos long  
Niugini**

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files  
dated 9 Oct 2020  
18a972db-abcc-5dc3-9031-f1d4455b33c3